

四庫全書

子部

欽定四庫全書

太平御覽卷一百六十四

宋 李昉等 撰

州郡部十

關西道

雍州

華州

同州

岐州

耀州

乾州

隴州

邠州

涇州

寧州

慶州

原州

靈州

鹽州

鄜州

坊州

丹州

延州

綏州

銀州

麟州

夏州

豐州

勝州

雍州

尚書禹貢曰黑水西河惟雍州厥土惟黃壤厥田惟上  
上厥賦中下厥貢惟球琳琅玕

文耀鉤曰岐華已北龍門積石南至三危雍州也

春秋說題辭曰秦金精堅故秦俗亦堅

春秋元命苞曰雍墜也東距蒲坂西有漢中南含高山

北阻居庸

應劭注漢志曰四面積高曰壅

李巡注爾雅曰河西其氣蔽壅也

晉太康地志曰雍州西北之位陰氣壅遏故以為名

三輔黃圖曰始皇表河以為秦東門表汧以為秦西川  
史記蘇秦說秦孝公曰秦四塞之國被山帶河外有洪  
河之險西有漢中巴蜀北有代馬之利此天府也

又曰獻公徙居櫟楊孝公作咸陽築冀闕徙都之

貨殖傳曰關中由汧雍以東至河華膏壤沃野千里自

虞夏之貢以為上田

漢書曰秦形勝之國也帶河阻山縣隔千里持戟百萬

秦得二百馮

言秦地險固二萬人可敵諸侯百萬人也

地勢便利其以下兵

於諸侯譬猶居高屋之上建瓴水也

瓴盛水瓶也居高屋之上而傾瓴水

言其自上之勢易也

又婁敬說高祖曰陛下都洛陽宜欲與周室比隆哉周之都洛陽為天下之中四方納貢道里均有德則易以王無德則易以亡今陛下欲比隆成康之時為不侔矣

且秦地被山帶河四塞以為固卒然有變急百萬之衆可當其固秦膏腴之地以為天府陛下入關而都之山東雖亂秦故地可全而有也夫與人鬪不搯其吭而拊其背未能相勝今陛下入關而都之此亦搯天下之吭而拊其背也高祖以問羣臣羣臣皆山東人爭言周王數百年秦二世而亡高祖疑而未能決及留侯言入關便即日車駕西都關中又百官表曰內史周官秦因之掌治京師景帝二年分置左內史右內史太初元年更

為京兆尹

東方朔傳曰三輔之地南有江淮北有河渭并隴以東  
商雒以西厥壤肥饒此所謂天府陸海之地也

後漢書曰董卓徙都長安謂陳紀曰三輔平敞四面險  
固土地肥美號曰陸海

三輔黃圖曰太初元年以渭城以西屬右扶風長安以  
東屬京兆尹長陵以北屬左馮翊以輔京師謂之三輔  
關中記曰秦西以關隴為限東以函谷為界二關之間

謂之關中地東西方千餘里

十道志曰雍州京兆郡禹貢九州之一爵置十二等雍州亦在焉武王都豐鎬平王東遷以岐豐之地賜秦孝公始尹咸陽秦兼天下置內史以領關中項籍滅秦分其地為三以章邯為雍王都廢丘司馬欣為塞王都櫟陽董翳為翟王都高奴謂之三秦高祖入關定三秦復為內史武帝改為京兆尹

華州

十道志曰華州華陰縣置在鄭縣禹貢雍州之域

元和郡縣圖曰周為畿內之國鄭桓公始封之邑其地  
邑名咸林春秋時為秦戰國為秦魏二國之境西嶽華  
山在焉秦為內史地漢為京兆尹

國語曰鄭桓公為周司徒食采咸林也

左傳曰晉侯許賂秦伯以河外列城五南及華山

史記曰秦武公十一年初縣北鄭

漢志曰秦屬京兆尹周宣王弟鄭桓公邑師古曰幽王

既敗鄭桓公死之其子武公與平王東遷也

爾雅曰河西華南之美者有華山之金玉焉

魏志曰董卓遷都長安華歆求出為下邳令

史記曰秦始皇二十六年東遊海上遣使關中至平舒

道有人持璧遮使者曰為我遺鎬池君

事具  
璧門

水經曰渭水東經平舒城即江神返璧於華陰平舒道

遺鎬池君之處也

尚書秦誓曰歸馬于華山之陽放牛于桃林之野

左傳曰晉使詹嘉處瑕以守桃林之塞

杜曰今華陰東澧關是也

### 同州

元和郡縣志曰同州馮翊郡禹貢雍州之域春秋時屬秦本大荔戎國秦獲之更名曰臨晉七國時屬魏秦併天下為京兆馮翊扶風並內史之地漢為河上郡復為內史武帝更名左馮翊魏但為馮翊郡後魏改同州以禹貢云澧水攸同故名之也

十道志曰漢王定三秦關中置三郡以塞國為河上郡

後罷三郡以為內史武帝改為左馮翊

應劭漢官解詁曰馮輔翊蕃故以為名

水經曰洛水東南經沙阜東西八十里南北三十里俗名沙苑

史記曰魏文侯十六年代秦築臨晉

十六國春秋曰苻健時河渭溢蒲津監寇登得履於河中長七尺健歎曰覆載之內何所不有

穆天子傳曰陽紆之山河伯馮夷之所都

漢志曰臨晉縣有河水祠又郊祀志祠河於臨晉

博物志曰馮夷華陰人得仙道為河伯

左傳曰秦晉戰于彭衙

注曰馮翊郃陽縣西北有彭衙城

又曰秦伐晉晉使呂相絕秦曰俘我王官翦我羈馬

羈馬

今在郃陽王官今在澄城

漢書曰宣帝徵時嘗困於蓮勺鹵中如淳曰為人所辱也蓮勺有鹽池名曰鹵中

又漢志曰蓮勺屬馮翊

蓮音輦勺音酌

漢志曰郤陽屬左馮翊在郤水之陽即大雅大明之詩  
曰在洽之陽

岐州

元和郡縣圖曰岐州扶風郡今為鳳翔府禹貢雍州之  
域春秋時戰國時為秦都屬內史高帝更名中地郡復  
屬內史景帝更名主爵都尉武帝改右扶風所以扶助  
京師行風化也

史記曰秦文公作郿時靈公作吳陽上時又作下時

今郿

內有三  
時原

又曰始皇二十七年巡隴西北地出雞頭山過回中

在扶  
風郡

漢書曰文帝十四年匈奴入蕭關殺北地都尉回中宮  
候騎至雍

水經曰郿縣有積石原魏青龍二年諸葛亮出斜谷與司  
馬宣王屯渭南郭洎算亮必爭北原遂先據之亮至果  
不得上

又魏氏春秋曰亮據渭南宣王謂諸將曰亮若出武功  
上依東轉是其勇也若西上五丈原即諸君無事矣亮  
果屯北原

國語曰周之興也鶯鶯鳴於岐山

今岐山縣是

三秦記曰陳倉山上有石鷄與山鷄不別趙高燒山鷄飛  
去而石鷄不去晨鳴山頭聲聞二十里或云玉鷄

耀州

五代史曰耀州本京兆府華原縣唐末李茂貞據鳳翔

僭行墨制建為耀州以義勝為軍額命溫韜為節度使

乾州

又曰本唐之奉天縣也唐末李茂貞建之為留後唐因之不改

隴州

元和郡縣圖曰隴州汧陽郡禹貢雍州之域秦文公所都漢為汧縣屬右扶風

禹貢曰導岍及岐至於荆山

說文曰隴天水大坂名也三秦記曰隴頭流水鳴聲鳴咽遙望秦川肝腸斷絕

又曰隴渭西關也其坂九迴不知高幾許凡上者七日乃得越

漢志曰隴屬右扶風即今之汧陽縣

邠州

元和郡縣圖曰邠州新平郡禹貢雍州之域公劉所居之地秦為內史地漢為右扶風本作豳字開元中以豳

與幽字相涉改為邠

漢志枸邑屬右扶風有幽鄉詩豳國公劉所都

左傳曰畢原豐邠文之昭也

十六國春秋曰苻堅時新平人王雕陳圖讖王猛以為  
左道惑衆勸堅誅之雕臨刑上疏曰臣師劉湛明於圖  
記謂臣曰新平應出帝王寶器願陛下志之後果獲玉  
器焉

十道志曰宜祿縣本漢鶉觚縣後魏又分置東陰盤縣

周地圖記曰秦使蒙恬北築長城又於北原築城以觚  
奠酒而祭有鶉飛止觚上因以名縣今鶉觚原

元和郡縣圖曰新平本漢漆縣

後漢書曰建武八年隗囂攻略陽上至漆進止未定會  
馬援夜至上喜問之援聚米以為山谷於上指軍所從  
入上笑曰虜在吾目中矣

涇州

元和郡縣圖曰涇州安定郡禹貢雍州之域春秋時屬

秦始皇時屬北地郡漢置安定郡

宋永初山川記曰安定處山谷之間昆戎舊壤迫近夷狄修習武備人皆以馳射為事

國語曰周共王遊於涇上密康公從有三女奔之其母

曰必致之於王夫獸三為羣人三為皀皀美之物也衆以美物歸汝而何德以堪王猶不堪況汝小醜小醜備物終必

亡康公不獻王王滅密

地有陰密城

詩大雅曰密人不恭敢距大邦

寧州

元和郡縣圖曰寧州彭原郡禹貢雍州之域當夏之衰  
公劉邑焉周時為義渠戎王國至秦昭王殺義渠戎王  
并其地始皇時為北地郡漢因之

漢志曰泥陽屬北平郡王莽曰泥陰應劭曰泥水出郁

郅北蠻中

十道志後漢改泥陽為  
富平後魏又改定平

又曰義渠道屬北地郡莽曰義蒲

漢書曰夏道衰而公劉失其稷官變於西戎邑于邠至

秦繆公得由余西戎八國服秦岐梁涇漆之北有義渠  
烏氏朐衍之戎築城郭以居秦稍蠶食之惠王遂取義渠  
二十五城秦昭王殺義渠戎王於是秦遂有隴西上郡  
之地

慶州

元和郡縣圖曰慶州順化郡禹貢雍州之域古西戎地  
后稷子不窋居之今不窋故城在焉春秋時義渠戎王  
國始皇時為北地郡

漢志曰郁郅屬北地郡有牧師苑官莽曰功著

周地圖記曰郁郅城今則名尉季城在白馬嶺兩川交口水經曰尉季亦曰不窋疑郁郅之訛也

十道志曰樂蟠縣本漢略畔道也

漢志曰略畔道莽曰延年道有略畔山俗呼曰洛盤音訛耳

原州

元和郡縣圖曰原州平涼郡禹貢雍州之域春秋時地

屬秦始皇時屬北地郡漢為安定郡

漢志曰高平屬安定郡莽曰鋪睦

班固安豐戴侯頌曰高平第一帝臨我師

漢書曰漢文十四年匈奴入蕭關殺北地都尉

十道志曰蕭關在原州

後漢曰隗囂使牛邯守瓦亭關

十道志曰蕭關瓦亭在平涼郡

靈州

元和郡縣圖曰靈州靈武郡禹貢雍州之域春秋戰國屬秦秦併天下為北地郡漢高為平富縣地

漢志曰靈武屬北地郡莽曰威成惠帝四年置靈州有河奇苑號非苑師古曰水中可居曰州此地在河之洲隨水高下未嘗淪沒故號靈州河奇二苑皆在北

十道志曰靈州有赫連勃勃所置果園水經云河水北有薄骨律鎮城在渚上舊赫連城也桑果榆林列植其上故謂之果州

圖經曰周宣政二年破陳將吳明徹遷其人於靈州江左之人崇禮好學習俗皆化因謂之塞北江南

### 鹽州

元和郡縣圖曰鹽州五原郡禹貢雍州之域春秋時戎狄地秦屬梁州漢置五原郡地有五原因而名之史記曰漆沮之北有義渠胸衍之戎即此地

漢志曰馬嶺屬北地郡以川形似馬嶺故以為名十道志曰馬嶺本鹽州也

元和郡縣圖曰後魏為西安州以其有鹽池又改為鹽州

鄜州 音夫

十道志曰鄜州洛交郡禹貢雍州之域春秋時秦地始皇時為上郡漢為上郡雕陰道地

史記秦文公畋于汧渭之間夢黃蛇其口止於鄜衍以為上帝之徵遂於鄜立時祭白帝焉

漢書云匈奴南侵至朝那膚施即此地

漢志曰雕陰屬上郡彫山在西南

坊州

元和郡縣圖曰坊州中部郡禹貢雍州之域春秋時翟國秦屬內史漢為右馮翊翟道縣之地姚興時置杏城周置馬坊唐高祖因置坊州取馬坊為名

漢書曰朔方為西部都尉休屠為北部都尉搜渠為中部都尉

郡志曰城本三秦高奴之地翟道故城即今郡城是也

俗謂之高樓城

穆天子傳曰癸酉天子命駕八駿之駟造父為御翔行  
經翟道升於太行

元和郡縣圖曰宜君縣前秦苻堅於葭裊縣故城置

延州

元和郡縣圖曰延州延安郡禹貢雍州之域春秋時白狄  
所居秦漢屬上郡高奴之地項羽以董翳為翟王居高  
奴即其地也

漢志曰膚施屬上郡有五龍山

水經曰渭水東經高奴水漢志高奴水合豐林水謂之清水

丹州

元和郡縣圖曰丹州咸寧郡禹貢雍州之域春秋時為白翟所居秦漢為上郡地

隋圖經集記曰義州孟春秋時白翟也其俗語云丹州白室即白翟語訛耳

綏州

元和郡縣圖曰綏州上郡禹貢雍州之域春秋白翟所居七國時屬秦秦併天下為上郡漢初屬翟國復改為上郡有疏屬之山山海經曰貳負之臣曰危危與貳負殺竊窳帝梏之疏屬之山桎其右足反縛兩手與髮繫之山上木即此

銀州

元和郡縣圖曰銀州銀川郡禹貢雍州之域春秋時白

翟地秦為上郡漢為河西郡固陰縣地

前漢志曰圜陰屬西河莽曰方陰師古曰圜字本作固  
縣縣在固水之陰因以為名也今有銀州銀水即是舊  
名猶存但字變耳

耆舊傳驄馬城即銀州城也符秦建元元年自驄馬城  
巡撫夷狄

麟州

元和郡縣圖曰禹貢雍州之域秦漢為雲中郡隋為勝

州天寶中分勝州地置麟州

晉太康地志曰自北地郡北行九百里五原塞即此地  
後漢光祿徐自為出五原塞數百里築城障列亭至盧  
朐山即今縣北光祿塞是也

夏州

元和郡縣圖曰夏州朔方郡禹貢雍州之域春秋及戰  
國時屬魏秦併天下屬上郡漢武分置朔方郡詩曰王  
命南仲城彼朔方

漢書曰武帝元朔二年遣將軍衛青將兵擊匈奴出雲

中至高闕遂至符離收河南地置朔方五原郡

符離漢北塞名

十六國春秋曰赫連勃勃於朔方築大城既成下書曰  
今都城已建宜立美名朕方統一天下君臨萬國都  
城宜以統萬為名

酈道元水經注統萬城赫連勃勃蒸土所築

又曰朔方縣有契吳山赫連勃勃北遊登之嘆曰美哉斯  
阜臨廣澤而帶清流吾行地多矣自馬嶺以北大河以

南未有若此之善者也

漢書曰武帝時北置朔方之郡公孫弘數諫以為罷弊中國以奉無用之地上使朱買臣等難弘發十策弘不得一

漢志曰朔方郡治窳渾莽曰溝搜窳渾有道西北出雞鹿塞又曰三封屬朔方郡今長澤縣有三封故城

豐州

元和郡縣圖曰豐州九原郡禹貢雍州之域秦漢地

勝州

元和郡縣圖曰勝州榆林郡禹貢雍州之域春秋時戎狄地戰國時晉趙地秦漢為雲中郡

秦本紀曰始皇十三年伐趙取雲中因以為郡

續漢書郡國志曰雲中郡領雲中咸陽楨陵沙南北與武泉原陽定襄武進成樂十一縣

太平御覽卷一百六十四

欽定四庫全書

太平御覽卷一百六十五

宋 李昉等 撰

州郡部十一

隴右道

秦州

渭州

蘭州

會州

河州

洮州

岷州

廓州

疊州

鄯州

凉州

甘州

肅州

瓜州

沙州

伊州

西州

庭州

秦州

十道志曰秦州天水郡禹貢雍州之域古西戎地秦始

封之邑秦為隴西郡漢武置天水郡

史記秦本紀曰周孝王時非子好馬及善畜養孝王分土邑之秦使續嬴氏

漢志曰天水郡莽曰填戎明帝改曰漢陽

秦州地記曰郡前有湖水冬夏無增減

漢志曰上邽屬隴西郡故邽戎邑也又曰成紀清水並屬天水郡清水莽曰識睦

漢志曰略陽道屬天水郡十二州志曰略陽即故冀城

也又曰街泉戎邑道屬天水郡

續漢書地理志有街泉亭

渭州

十道志曰渭州隴西郡春秋及戰國時羌戎所居秦昭王伐義渠戎王始置隴西郡

禹貢曰導渭自鳥鼠同穴又曰終南敦物至于鳥鼠

漢志獮道戎邑也屬天水郡即今隴西縣

獮音完

地理志曰漢陽有大坂名隴坻亦曰隴山郡處其西故

曰隴西其山堆旁崩聲聞數百里揚雄所謂響若坻頽是也

蘭州

十道志曰蘭州金城郡禹貢雍州之域古西戎地秦併天下為隴西郡

後漢書西羌傳羌無弋爰劍魯孫忍留湟中忍子研立研至豪健故羌中號為研種秦始皇時務併六國兵不西行故羌人得蕃息及秦併天下築長城以界之衆羌

不復南渡漢興匈奴冒頓兵強臣服諸羌景帝時研種  
留何率種人求守隴西於是徙留何於狄道

漢志曰狄道屬隴西郡以其地有狄種故云狄道

又曰浩亶水出西塞外東至允吾入湟水詩大雅曰鳬  
鷖在亶亦其義也蘭州有浩亶故城浩亶音合門

漢志曰金城郡領縣十三應劭曰初築城得金故曰金  
城瓚曰稱金取堅固也故墨子曰金城湯池

會州

十道志曰會州會寧郡禹貢雍州之域古西羌地秦併天下屬隴西郡漢屬金城郡唐武德二年平李軌置西令貞觀八年改為會州

元和郡縣志曰後周太祖為西魏相來秦會師於此因置州為名唐貞觀亦為粟州

### 河州

十道志曰河州安鄉郡禹貢雍州之域古西羌地秦併天下為隴西郡漢分置天水郡

漢志曰枹罕屬金城郡故罕羌侯邑也枹音鈇字從木

禹貢曰導河積石至於龍門

積石山在金城西南

西域傳曰河注蒲昌海潛行地下南出於積石山

洮州

十道志曰洮州臨洮郡禹貢雍州之域秦漢諸羌之地  
漢志曰洮水出西羌中北至枹罕東入西傾

岷州

十道志曰岷州和政郡禹貢雍州之域六國時屬秦秦併

天下為隴西之臨洮縣

史記曰蒙恬築長城起臨洮

廓州

十道志曰廓州寧塞郡禹貢雍州之域古西羌地

漢書曰宣帝時諸羌數背叛後將軍趙充國屯隴西  
羸之諸羌不敢動

後漢書段熲傳曰延熹中熲當燒河當煎勒姐等八種羌寇  
隴西金城熲進討大破之明年燒河大豪寇張掖熲斬

燒河首虜五千餘人西羌於是弭定

疊州

十道志曰疊州合川郡禹貢梁州之域歷秦漢魏晉為諸羌所據

後周書曰建德六年西逐諸戎始統有其地因置恒香郡後尋為疊州蓋以其地多山重疊以名郡也又於三交口築城置甘松防又為三川縣以隸恒香郡至建德九年改三川縣為常芬縣仍立芳州以邑隸焉取其地

多芳草為郡之名

薊州

十道志曰薊州西平郡禹貢雍州之域古西戎之地  
漢志曰允吾屬金城郡今龍支縣即其地

涼州

十道志曰涼州武威郡禹貢雍州之域自六國至秦戎  
狄居焉漢初匈奴右地

釋名曰西方寒凍或云河西土田薄故曰涼

晉書曰姑臧城匈奴新築舊蓋臧城語訛後云姑臧

又曰惠帝末張軌求為涼州於是大城此地為一會府  
以據之號前涼後呂光據之號後涼

禹貢曰原隰底績至于潏野織皮崑崙折支渠搜西戎  
即叙

續漢書曰西羌自賜支以西至河首左右居

今河關西  
可十餘里

有河曲羌  
謂之賜支

異物志曰古渠搜國當大宛北界潏野今姑臧界潏野

是

劉炳燉煌實錄曰晉安帝隆安元年涼州牧李嵩微服出城逢虎道邊虎化為人遙呼嵩為西涼君嵩因驕弧待之又遙遙呼嵩曰有事告汝無疑也嵩知其異投弓於地人乃前曰燉煌空虛不是福地君之子孫王於西涼不如從酒泉言訖乃失嵩乃移都酒泉

續漢書曰安帝時匈奴寇常山於是西北有爭民饑民用不足大將軍鄧騭欲棄涼州專務北邊曰譬如家人

衣壞敗一以相補猶有所完若不如是將兩無所保郎中虞詡曰大將軍之策不可者三先帝關境而今棄之不可一也棄涼州郡即以三輔為塞園陵單外不可二也諺曰關西出將關東出相烈士武臣多出涼州風土壯猛便習兵事今羌所以不過三輔為腹心害者以涼州在其後也

甘州

十道志曰甘州張掖郡禹貢雍州之域自六國至秦戎

狄居焉漢為匈奴右地

尚書禹貢曰道弱水至于合黎

十道志曰今張掖有合黎水漢志西域傳曰月支本居  
敦煌初連間霍去病傳曰濟居延遂臻小月支攻初連  
即此道也

漢志曰張掖郡匈奴昆邪王地武帝時開之莽曰設屏  
應劭曰張國臂掖故曰張掖也

又曰酈得屬張掖郡有千金渠西至樂涇入澤中莽曰

官式

涓音官  
麟音鹿

又曰刪丹屬張莽曰貫虜

肅州

十道志曰肅州酒泉郡禹貢雍州之域古西戎地月支所居漢為武威酒泉郡也

漢書曰武帝元狩二年昆邪王殺休屠王將其衆來降以其地為武威酒泉郡

又匈奴傳曰漢置酒泉郡以隔絕胡與羌通之路又

西通月支大夏以公主妻烏孫王以分匈奴西方之援  
國其水甘若酒故名酒泉

後漢書曰班超久在西域年老思土上書曰臣不敢望

到酒泉郡但願生入玉門關

玉門屬敦煌今州地也去  
長安三千六百里酒泉今

肅州也去長安  
二千八百里

### 瓜州

十道志曰瓜州晉昌郡禹貢雍州之域古西戎地戰國  
時烏孫月支居焉漢初為匈奴右地後為武威酒泉二

郡

漢志曰冥安屬敦煌郡冥水出焉又名籍端水出羌中入澤冥安即晉昌地

又曰廣至宜禾都尉治崑崙障莽曰廣桓即常樂地有宜禾故城

沙州

十道志曰沙州敦煌郡禹貢雍州之域古西戎地秦屬西戎漢置敦煌郡

左傳范宣子數戎子駒曰昔秦人追逐乃祖吾離於瓜州蒙犯荆棘以來歸我先君惠公有不腆之田與汝剖

分而食之

瓜州地屬燉煌

漢書曰武帝元鼎六年詔分酒泉置敦煌郡徙民以實

之

應劭曰敦大也煌盛也

又西域傳曰東則接漢院以玉門陽關

孟康曰陽關在敦煌西界也今

壽昌有陽關及玉門故關

伊州

十道志曰伊州伊吾郡本伊吾盧地在敦煌之北大磧之外南去玉門八百里

後漢書曰永平十六年明帝命將北征取伊吾盧地置宜禾都尉以屯田

又西羌傳曰伊吾地宜五穀桑麻葡萄其北有柳中皆膏腴之地故漢常與匈奴爭車師伊吾之地以制西戎

西州

十道志曰西州交郡

漢書西域傳曰車師後王國有新道通玉門關戍已校尉徐普欲開以省道里半避白龍堆之阨車師後王姑句以道當為拄置即馳突出高昌壁入匈奴

後魏書曰以其地勢高峻人物昌盛因名高昌

### 庭州

十道志曰庭州雍州之外流沙之西北前漢烏孫舊地東與匈奴接歷代為羣胡所居

後漢西域傳曰貳師伐西域諸國震懼自敦煌西至鹽

澤往往起亭而輪臺渠犂皆有田卒

後漢書曰班超將兵擊伊吾於蒲類海

太平御覽卷一百六十五

欽定四庫全書

太平御覽卷一百六十六

宋 李昉等 撰

州郡部十二

劍南道

劍州

緜州

梓州

遂州

益州

漢州

彭州

蜀州

邛州

普州

雅州

瀘州

茂州

翼州

當州

悉州

靜州

拓州

恭州

維州

奉州

雋州

姚州

黎州

龍州

松州

嘉州

簡州

陵州

眉州

榮州

資州

戎州

劍州

圖經曰晉安郡禹貢梁州之域秦蜀郡漢廣漢郡之梓潼縣

華陽國志曰諸葛亮鑿石架空為飛閣道通蜀漢即此  
三國志曰鄧艾伐蜀自陰平縣景谷步劍閣道懸車束  
馬逕出江由至廣漢即此地也

蜀記曰梓潼縣有五婦山一名五婦臺秦遺蜀美女五人  
蜀遣五丁迎女至梓潼五丁踣地大呼驚五女並化為石  
郡國志曰梓潼縣北有華容水蜀都賦却背華容是也

縣州

十道志曰縣州巴西郡禹貢梁州之域周併梁入雍春秋

戰國入蜀國秦為蜀郡漢廣漢郡今州即廣漢郡之涪縣也  
九州記曰緜州之賁人濮人皆夷也

郡國志曰賁人勁勇銳氣而善舞故古有巴渝舞

蜀記曰左緜緋紅三川所尚

緜州左郡縣有小紅所染緋紅於此水濯後益鮮

宋書曰范栢年梓潼人明帝問卿鄉土有貪泉否栢年  
曰臣梁益之地有廉水讓水不聞有貪泉帝嘉之即以

為蜀郡太守

廉讓水在昌期縣

郡縣志曰神泉縣有泉拾四甘香異常固疾飲之即瘥

故曰神泉

漢書志曰涪屬廣漢郡有屏亭莽曰統睦應劭曰涪水出廣漢南入漢

梓州

十道志曰梓州梓潼郡禹貢梁州之域漢武分置廣漢郡漢書曰文帝以蜀道銅山賜鄧通鑄錢即今銅山縣也蜀志曰先主入蜀攻劉璋遣諸葛亮等分州定縣略地至郫百姓以牛酒勞軍又姜維聞諸葛瞻破乃引軍

由廣漢郡道以審虛實

十道志曰廣漢之地有鹽井銅山之富本禹貢南夷周末秦併為郡有蔬食果實之饒

九州要記曰玄武山一名赤雀山一名宜君山山有麀尾入貢

又華陽國志曰玄武山一名三峒山出龍骨傳云龍昇不達墜此民取以入藥用玄武縣因山得名

遂州

十道志曰遂州遂寧郡禹貢梁州之域漢分梁州置廣漢郡今州又為廣漢縣

九州要記曰青石縣有青石山天下青石無佳於此可為鐘磬

又郡國志曰昔巴蜀爭界歷歲不決漢高八年山自裂如索所界巴蜀之民懼天譴乃息所爭

益州

十道志曰益州成都府古梁州巴濮庸蜀之地在秦益

漢中巴蜀三郡地

釋名曰益阨也所在之地險阨

應劭地里風俗記曰疆壤益廣故號益州

史記曰周太王逾梁山之岐山一年成邑二年成都故有成都之名

又曰秦惠王時韓蜀相攻各告急於秦秦欲先伐韓司馬錯曰不如伐蜀蜀戎狄之長也有桀紂之亂以秦攻之譬使豺狼逐羣羊也又有禁暴止亂之名今攻韓周

自知失九鼎韓自知亡三川二國併力合謀而求解于  
楚魏臣竊危之王曰善遂定蜀

漢書曰宣帝時方士上言益州部有金馬碧鷄神帝令  
王褒入蜀祀之

揚雄蜀王本紀曰蜀之先稱王者有蠶叢折灌魚易俾  
明是時椎髻左衽不曉文字未有禮樂從開明已上至  
蠶叢凡四千歲次曰伯雍又次曰魚尾尾田於湍山得  
仙後有王曰杜宇出墮天山又有朱提氏女名曰利自

江原而出為宇妻乃自立為蜀王號曰望帝移居郫邑  
十三州志曰當七國稱王獨杜宇稱帝於蜀以褒斜為  
前門熊耳靈關為後戶玉疊峨眉為池澤汶山為畜牧  
中南為園苑時有荆地有一死者名鼈靈其尸亡至汶  
山却是更生見望帝以為蜀相時巫山蜀地雍江洪水望  
帝使鼈靈鑿巫山治水有功望帝自以德薄乃委國於  
鼈靈號曰開明遂自亡去化為子規故蜀人聞鳴曰我  
望帝也

又云望帝使黿靈治水而淫其妻靈還帝慙逐化為子規  
杜宇死時適二月而子規鳴故蜀人聞之皆曰我望帝也  
自開明已下五葉始立宗廟時蜀有五丁力士能徙山岳  
每一王死五丁輒為立大石以誌墓今石井是也號曰井  
成都記曰郡城即秦惠王使張儀築以象咸陽者沃野  
千里號曰陸海

九州志曰益州城初累築不立忽有大龜周行旋走因  
其行築之遂得堅固故曰龜城

南史曰宋太始初益州市橋忽生一洲有道士柳石見之曰當有貴王臨州必王勝喜也及齊永明二年武帝遣始興王為益州勝喜者即始興反語

續漢書郡國志曰益州部漢中巴廣漢蜀犍為越嶲牂牁益永昌凡九郡

華陽國志曰成都夷里橋南岸道西有城即錦城一曰錦宮又曰錦里

又曰蜀初少文教文翁為蜀郡太守立精舍學堂以厲

其俗因是文教聿興今有文翁堂在城內

漢州

圖經曰漢州德陽縣土地同益州秦屬蜀郡漢屬廣漢郡後漢因之兼置益州領郡十二

蜀記曰益州謂之三蜀廣漢其一也

後漢書雒城南每陰雨常有哭聲和帝時陳寵為太守聞之即勅縣收葬骸骨哭聲遂絕

蜀記曰金堂縣古有金船沉江之東岸民於水中往往

見之

彭州

十道志曰彭州濛陽郡本漢繁縣宋置壽陽圖經曰唐垂拱二年以九隴縣置彭州取古天彭關以為名

周地圖記曰宋元嘉九年有樵人逐麋所趨險絕進入石穴行數十步豁然平博問是何所人答云小成都後更往求之不知所在

地理志曰九隴縣晉置以縣有九曲山為名

蜀州

十道志曰蜀州唐安郡本漢蜀郡江原縣莽曰邛原  
魏志曰蜀州鳴鶴山張道陵客蜀學道於此山造作符書  
以惑百姓

益州記張道陵登仙之所傳云陵為蝮蛇所吸人以為登仙  
蜀記曰青城縣因山得名山上有黃帝授道壇  
又玄中記云山有穴潛行分為三道各通一處

邛州

十道志曰邛州臨邛郡禹貢梁州之域漢武置十三州在益州之部

周地圖記曰梁武陵王蕭紀於蒲水口改置邛州南郡有邛來山因以為名

史記曰蜀卓氏之先趙人秦破趙卓氏獨夫妻推輦而行曰吾聞汶山之下沃野有蹲鴟乃求遠遷致之臨邛因銅山鑄錢即此也

蜀記曰漢張騫奉使尋河源得高節竹植於邛山號曰

邛竹今緣山皆是可為杖

蜀志曰臨邛有火井諸葛亮一窺更盛

博物志曰後人以家火投之火即滅至今不然

普州

十道志曰普州安岳郡禹貢梁州之域漢武十三州在益州之部今州境則漢之資中牛鞞墊江後漢之德陽等四縣

雅州

十道志曰雅州廬山郡禹貢梁州之域漢武十三州在益州之部即秦嚴道縣

蜀記曰秦滅楚徙嚴王之族於此故謂之嚴道

漢志曰嚴道屬蜀郡邛來山邛水所出東入青衣莽曰嚴治

郡國志曰漢源縣有離崖即蜀守李冰所鑿按離即古雅也

又曰嚴道縣有九折坂即王陽迴轡之所

瀘州

十道志曰瀘州瀘川郡禹貢梁州之域春秋戰國時為巴子國秦屬巴郡漢屬犍為郡

漢志曰江陽屬犍為郡十道志曰瀘州本漢江陽縣地諸葛亮出師表曰五月渡瀘深入不毛

茂州

十道志曰茂州通化郡禹貢梁州之域本冉駹國漢以為郡

史記曰南越破後丹駝等皆震懼請臣置吏以丹駝為汶山郡守

翼州

圖經曰翼州臨翼郡秦之土地與益州同二漢屬蜀郡本漢之蠶陵也

漢志曰蠶陵屬蜀郡王莽曰步昌

當州

十道志曰當州江源郡禹貢梁州之域周為雍州之境

後周書曰天和元年鴈門公紇干略於此討渾胡因置同昌郡

悉州

十道志曰悉州歸誠郡禹貢梁州之域古西戎地

圖經曰唐顯慶三年割當州三十里左封縣界內有悉唐川因名為悉州

靜州

圖經曰靜州靜川郡土地與唐當州同唐永徽四年置

靜州興唐縣以隸夷落

拓州

圖經曰拓州蓬山郡土地與當州同唐顯慶三年置州取其拓封疆為郡之名

恭州

圖經曰恭州恭化郡北接土蕃地與當州同唐顯慶中置恭州取恭慕王化為名

維州

十道志曰維州維川郡蜀志曰姜維馬維督將軍張巖  
北討汶山叛羌即此

圖經曰武德中白苟羌首領以地內附因於羌故城置  
維州以領之

奉州

圖經曰奉州雲山郡本蠻夷之地南接土蕃為夷之塞  
武德中羌夷內附立奉州取其奉順王命為名

舊州

十道志曰舊州越舊郡本益州西外夷漢初為邛都國  
史記曰西南夷滇以北君長十數邛都最大

漢志曰越舊郡武帝元鼎六年開莽曰集舊屬益州應  
劭曰故邛都國也有舊水言越此水以章休盛也

九州要記曰舊之西夷人身青面有文如龍鱗

博物志曰越舊國有牛稍割取肉經日必復生如故又  
玄中記曰割而復生名曰反牛

十道記曰越舊有瀘水四時多瘴氣三四月間發人衝

之立死非時中人多悶絕唯五月上伏即無害故諸葛亮征越雋上疏曰五月渡瀘深入不毛

又地記曰今昆明道渡所見有武侯道在

十道記曰水浚而巉石土人以牛皮為船方涉津渡

九州要記曰臺登縣有雙諾川鸚鵡山黑水之間若水出其下即黃帝子昌意降居若水此

漢志曰旄牛屬蜀郡鮮水出徼外南入若水若水亦出

徼外南至大柞

旄牛即今臺登縣

姚州

十道志曰姚州雲南郡蓋夷越之地亦為滇王國漢武  
開之置益州部有滇池澤後因為益州雲南弄棟二縣  
漢地理志曰益州郡武帝元封二年開莽曰新就故滇  
王國也有滇池大澤又有弄棟縣焉

華陽國志曰漢滇句町夜郎葉榆桐師雋唐侯王國以  
十數編髮左衽隨畜遷徙莫能相禦楚頃襄王遣將軍  
莊蹻泝沅水出苴蘭以伐夜郎而秦奪楚黔中地無路

反遂留王之

黎州

圖經曰黎州洪源郡漢為沈黎郡宋齊以來並為沈黎郡後周破羌夷立黎州

龍州

十道志曰龍州江油郡秦漢及魏不置郡縣

魏志曰景元四年諸軍征魏鄧艾自陰平行無人之地七百餘里鑿山通道造作橋閣山高谷深至為艱險艾

以氍自裏推轉而下將士皆攀木緣崖魚貫而進先登至江由即此地也

周地圖經曰江油郡楊李二姓各自稱藩於梁至後魏武帝得其地置江油郡西魏於此立龍州

### 松州

十道志曰松州交川郡禹貢梁州之域又為雍州之域秦漢諸羌居焉

圖經曰郡有甘松嶺因以名郡

山海經曰甘松嶺亦謂之松桑嶺江水發源於此

江源記曰平康縣有羊腸嶺大江發源之所

嘉州

十道志曰嘉州犍為郡禹貢梁州之域漢犍為郡之南安縣

史記曰漢武使唐蒙伐西戎得夜郎國遂立犍為郡漢志曰青衣縣屬犍為郡順帝改名漢嘉

十道志曰周武保定元年於此置青州遙取漢青衣縣

為名宣政二年改為嘉州

華陽國志曰青衣有沫水漢志蜀李冰鑿離堆避沫水之害又益州記曰青衣神號為雷堆廟班固以為離堆益州記曰峨眉山兩山相對望之如峨眉

簡州

十道志曰簡州陽安郡禹貢梁州之域漢犍為之牛鞞縣地

華陽國志曰牛鞞縣有陽明井今在郡北十里

九州要記曰簡州在赤水之北

周地圖記曰晉義熙末刺史朱齡石率建平人征蜀仍於東山立金城後魏平蜀改為金水郡

陵州

十道志曰陵州仁壽郡禹貢梁州之域漢犍為郡之武陽縣東隅也

郡國志曰張道陵於此得鹽井祠玉女於井內因謂之陵井郡因井得名

益州記曰郡東隅有三山相對去陵井百里

郡國志曰有鼎鼻山周之九鼎淪沒於此故後人往往見鼎耳因名之

又曰郡有朝女山昔有朝祖女於此山得道今足跡尚存故名朝女山

眉州

十道志曰眉州通義郡禹貢梁州之域犍為郡之武陽南境

周地圖記曰梁武帝太清二年武陵王蕭紀開通越雋立青州於通郡南安縣北後魏二年平蜀三年改青州

為眉州

用峨眉  
山為名

蜀記曰秦惠王使張儀司馬錯伐蜀蜀主開明拒之不

利退至武陽見獲

彭山縣  
即其地

郡國志曰青神縣當羌蜀之要漢武使唐蒙破西南夷路即始於此

榮州

十道志曰榮州和義郡禹貢梁州之域漢為南安縣地屬犍為郡

九州要記曰和義郡古夜郎之地有成都市漢武中時南令使通犍道無功唐蒙因殺之令曰恨不見立成都市而死蒙即立市如成都以殺之故曰成都市

益州記曰旭川縣有馬鳴戍漢刺史韋枚夜過此地有神馬嘶漢中馬皆嘶以應之故以此名戍

蜀記曰昔有女人於溪浣沙有大竹流水而觸之因有

孕後生一子自立為王因以竹為姓漢武使唐蒙伐牂牁郡竹王因有此地人不忘其本立王廟祀之

資州

十道志曰資州資陽郡禹貢梁州之域漢為犍為郡之資中縣地

周地圖記曰後魏廢帝二年於武康郡之陽安縣置資

州

陽安在今安州北蘭州界

郡國志曰內江縣有水深百丈實在羣州總會之所

戎州

十道志曰戎州南溪郡春秋僰侯國秦惠王破滇池始通五尺道漢武得蜀故使唐蒙理道於此而破牂牁即此道也後為僰道縣以屬犍為郡

郡國志曰南溪縣西三十里有魚津津南有鴛鴦圻

益部耆舊傳曰僰道有張真娶黃氏女名帛真因乘船過江船覆沒帛求夫屍不得自沈於水積十四日乃抱夫屍出於灘下故名鴛鴦圻

太平御覽卷一百六十六

欽定四庫全書

太平御覽卷一百六十七

宋 李昉等 撰

州郡部十三

山南道上

荊州

峽州

歸州

復州

郢州

鳳州

成州

武州

興州

宕州

扶州

文州

利州

夔州

開州

合州

忠州

萬州

閬州

果州

荊州

十道志曰荊州江陵郡漢舊縣屬南郡

禹貢曰荊及衡陽惟荊州

春秋元命苞曰軫散為荊州分為楚國爾雅曰漢南曰荊州  
周官職方氏曰正南曰荊州其山鎮曰衡山其澤數曰雲  
夢其川江漢其浸潁湛其利丹銀齒革

晉元康地記曰荊州於古蠻服之地

漢書曰臨江閔王榮坐侵廟壩地為官上徵榮榮行祖  
於江陵北門既上車軸折車廢江陵父老流涕言曰吾

王不返矣王至詣中尉府郅都責訊王王怒自殺

漢書地理志南郡江夏零陵桂陽武陵長沙漢中汝南楚分也  
史記曰蘇秦說威王曰楚西有黔中巫郡東有夏州海  
陽南有洞庭蒼梧北有涇塞郢陽地方五千餘里帶甲  
百萬車千乘騎萬匹粟支十年此霸王之資也

淮南子曰楚地南卷沅湘北繞潁泗西包巴蜀東裹鄧  
邳潁汝以為泗江漢以為池垣之以鄧林綿之以方城  
山高尋雲霓深谿肆無景

十二州志曰漢章帝建初二年徙鉅鹿王恭為江陵王  
三公上言江陵在京師正南不可以封乃徙為安陸王  
盛宏之荊州記曰元嘉中以京師根本之所寄荆楚為  
重鎮上流之所總擬周之分陝晉宋以降此為西陵

釋名曰荊州取名荆山又曰荆警也南蠻數寇常置警  
左傳曰楚子西汭漢沂江將入郢王在渚宮下見之

十道志曰當陽縣舊縣屬南郡廣陽思王子蓋之所封  
荊州記曰當陽本楚之舊邑左氏傳云楚潘崇伐麇至

于錫穴潁容釋例云麇在當陽

十道志曰公安縣漢孱陽縣地吳之南郡

荊州記曰蜀主敗于襄陽南奔荊州吳大帝擢為左將軍  
荊州牧城此而鎮之時號蜀主為左安軍故名其城曰公安  
古今地名曰松滋縣古鳩茲地漢屬廬江郡

峽州

十道志曰峽州夷陵郡春秋戰國時並楚地秦置三十  
六郡屬南郡魏武於此置江陵郡梁置宜州周武帝以

州居三峽之口改為峽州

史記曰秦昭王二十九年秦將白起攻楚燒夷陵

吳錄曰蜀昭烈皇帝立宜都郡於西陵

宜都記曰宜都郡陸抗攻步闡於此

荆渚記曰夷陵郡居大江之上西通全蜀故夷陵有安

蜀古城

吳志曰陸遜上疏夷陵迺要害之地實國家之關限若失之非損一郡荊州亦可憂也

十道志曰宜都縣本漢夷陵縣屬南郡

袁山松宜都山川記曰南崖有山名荆門北崖有山名虎牙故曰荆門虎牙即楚之西塞

歸州

十道志曰歸州巴東郡在周為夔子國屬楚秦併天下為南郡之地漢置秭歸縣唐武德二年割夔州之秭歸巴東二縣置歸州

袁山松記曰屈原此縣人既被流放忽然暫歸其姊亦

來因名其地為秭歸

秭與姊同

三國志曰吳置建平郡即宜都之西部也晉王濬自蜀江沿流伐吳守將吾彥表皓曰請增建平兵若建平不下晉師終不敢過皓不從

### 復州

十道志曰復州竟陵郡禹貢荊州之域春秋戰國時屬楚秦兼天下屬南郡漢十三州在荊州部即江夏之竟陵縣地唐武德五年為復州

郡國志曰沔陽縣即楚王城也

圖經曰監利縣漢容縣乾谿章華臺在焉

郢州

十道志曰郢州富水郡歷代所屬與竟陵郡同二漢屬江夏郡晉宋以來為竟陵郡地西魏屬安州後周武置郢州隨廢唐武德六年為郢州

郡國志曰長壽縣武陵山春秋謂楚平王卒於櫛木之下即此山也

鳳州

十道志曰鳳州河池郡土地所屬與金州同在秦隴西  
郡地漢為故道縣地故道今兩當縣是漢武改雍為涼  
後為涼州之地

水經曰兩當縣水出陳倉縣之大散嶺西南流入故道  
川謂之故道水縣因水取名或云縣西有兩山相當故  
名之

華陽國志曰河池一名仇池

郭仲產秦州記云仇池山一名仇維山上有池似覆壺  
前志云是縣以山得名

水經曰大散水流入黃花川黃花縣因水得名

成州

十道志曰成州同谷郡禹貢梁州之域古西戎地周省  
梁入雍為白馬氏國

史記西南夷傳曰自筰以東北君長以什數冉駹最大自  
冉駹以東北君長以什數白馬最大皆氏類也

後漢書曰河池一名仇池地方百頃左右悉白馬氏

武州

十道志曰武州武都郡土地所屬與成州同亦白馬氏之地

漢書西南夷傳曰漢誅且蘭君并殺笮侯冉駹等皆震懼請臣置吏以為廣西部至元鼎六年以白馬氏為武都郡

隴右記曰武都紫水有泥其色紫而粘貢之用封璽書

故詔誥有紫泥之美

郡國志曰武帝沮水之西有角弩谷即蜀將姜維割五溪蠻之所

魚豢魏略曰文帝黃初元年徙武都於美陽在今雍州好畤縣界武都故城是也

興州

十道志曰興州順政郡戰國時白馬氏之東境秦併天下為蜀郡地漢武元鼎六年置武都郡

晉書曰懷帝永嘉中氏之人楊茂搜據武都郡子孫承嗣為氏王

周地圖記曰郡有丙山山有穴即丙穴其口向丙因以為名每春三月上旬有魚長八九寸或二三日聯鯀從穴出躍相傳名為嘉魚左太沖蜀都賦曰嘉魚出丙穴

### 宕州

十道志曰宕州懷道郡禹貢梁州之域古羌地周為雍州之境秦漢魏晉諸羌據之

後漢書曰梁彌忿者宕昌羌也其先帝為豪祖勒自稱  
宕昌王彌忿世祖初求內附遂拜彌忿為宕昌王因封  
其地為宕昌藩即今宕州

扶州

十道志曰扶州同昌郡禹貢梁州之域實西戎之地周  
省梁入雍為雍州地秦漢魏晉並屬蕃夷

後魏書曰廢帝前元年西逐吐谷渾定陰平於此置鄧  
州及鄧寧郡取前羌部落所居為之名時又置帖夷縣

屬封統郡以戎夷寧帖為義也

周地圖記曰後漢廢帝置同昌郡屬封統郡

文州

十道志曰文州陰平郡禹貢梁州之域周為雍州之境  
戰國時氐羌據焉漢武時開西南夷置陰平道以統其  
衆

蜀志曰鄧艾自陰平景谷步道懸兵東馬經江由出綿  
竹

華陽國志曰晉永平之後羌虜數叛遂立為郡以遏之  
輿地志曰晉永嘉之末太守王鑒以郡降李雄晉人因  
是悉流移於蜀漢其氏羌並屬楊茂梗化後不復為正  
朔所頒

利州

十道志曰利州益昌郡土地所屬與金州同春秋戰國  
時並屬蜀侯漢葭萌縣也

華陽國志曰昔蜀王封其弟於漢中號曰苴侯因命其

地曰葭萌苴侯與巴王通好巴與蜀為讎故蜀王怒伐苴苴奔巴求救於秦秦乃伐蜀遂滅蜀及巴苴置巴蜀二郡

水經曰益昌有小劍城去大劍城戍三十里連山絕險飛閣通衢故謂之劍閣也

蜀志曰先主使陳戎絕馬鳴閣魏武聞之喜曰此閣迺漢中之平陰乃咽喉之要路

馬鳴閣在益昌縣

夔州

十道志曰夔州雲安郡春秋時為魚國秦併天下為巴郡地漢為魚復縣

左傳曰庸蠻叛楚莊王伐之七遇皆北唯裨儵魚人實逐之杜曰裨儵魚庸三邑魚魚復縣

漢志曰江關都尉理魚復有橘官魚庸三邑魚魚復縣郡國記曰白帝城即公孫述至魚復有白龍出井中因號魚復為白帝城昭烈因改魚復為永安又後漢書公孫述自以承漢土德故號曰白帝城

蜀志曰羅憲為領軍守永安聞魏軍平蜀三日哭於都亭  
荊州圖記曰永安宮南一里渚下平磧上有諸葛亮孔  
明八陣圖聚細石為之各高五尺皆綦布相當中間相  
去九尺正中開南北巷悉廣五尺或為人散亂及為夏  
水所沒至冬水退如故

荊州記曰壘西聚石為八行行八聚謂之八陣圖因曰  
八陣既成自今行師不復敗後見莫能了之桓宣武伐  
蜀見之曰此常山地勢也

開州

十道志曰開州盛山郡本漢朐腮縣之地

合州

圖經記曰合州巴川郡秦漢屬巴郡宋置東宕渠郡西魏置合州

忠州

十道志曰忠州南賓郡土地所屬與夔州同譙周巴郡地記曰後漢獻帝初平六年臨江縣屬永寧郡建安中

改永寧為巴東郡臨江仍舊焉續漢志曰和帝永元中  
分枳縣置平都縣

史記蘇代曰楚得枳而國亡

### 萬州

十道志曰萬州南浦郡土地所屬與通州同漢為巴郡  
朐腮縣地

續漢志曰朐腮屬巴郡

尋江源記曰梁山東西數千里望之若長雲垂天劍閣

銘曰巖巖梁山積石峨峨

又曰丙穴有嘉魚其味甚美丙穴在梁山縣柏枝山

閬州

圖經曰閬州閬中郡禹貢梁州之域春秋為巴國之地  
秦漢為巴郡

華陽國志曰巴子後理閬中

地形志曰閬中居蜀漢之半當東道要衝今郡城即古  
之閬中城後謂之隆城是也

後魏典略曰此州古有隆城堅險因置隆州尋又立盤龍郡以郡中有盤龍山為名

三巴記曰閬中有渝水實民銳氣喜舞故高祖樂其猛銳數觀其舞使樂人習之故樂府中有巴渝舞

### 果州

十道志曰果州南充郡禹貢梁州之域春秋戰國並屬巴子國秦惠王滅巴蜀是為巴郡地自漢晉為安漢縣華陽國志曰漢獻帝初元年劉璋分墊江縣為巴郡理

此縣

周地圖記曰相如縣有司馬相如故宅因以名縣

郡國志曰馮緄為車騎將軍於此鑄崖十有餘處今果山有車騎崖

益州記曰南充縣西有大昆井即古之鹽井也

唐書曰貞元中謝真人於郡中之紫極宮上昇萬目所覩郡郭是夕處處有虹霓雲氣

太平御覽卷一百六十七

欽定四庫全書

太平御覽卷一百六十八

宋 李昉等 撰

州郡部十四

山南道下

梁州

洋州

商州

金州

房州

通州

渠州

渝州

涪州

朗州

澧州

巴州

壁州

蓬州

集州

唐州

鄧州

襄州

均州

隨州

梁州

圖經曰梁州漢中郡春秋至戰國楚地秦漢為漢中郡  
蜀志曰先主初得漢中曰曹公雖來無能為也

漢書曰項羽立沛公為漢王王巴蜀漢中四十一縣都  
南鄭沛公欲攻楚丞相蕭何諫曰雖王漢中之惡不猶  
愈於死乎語曰天漢其稱甚美願大王王漢中養其民  
以致賢人收用巴蜀還定三秦天下可圖也

### 洋州

十道志曰洋州洋川郡春秋戰國並楚地秦為漢中郡

漢志曰成固屬漢中郡

今洋源縣地是也

又曰安陽屬漢中鰲谷水所出

今黃金縣地

### 商州

十道志曰商州上洛郡禹貢梁州之域周為豫州之境  
戰國時屬秦秦併天下為內史地漢武置上雒縣於此  
史記張儀說楚懷王大王誠能絕約於齊臣請獻商於  
之地六百里楚於是與齊絕約使一將軍隨張儀至秦  
儀謂楚使者曰臣有奉邑六里願以獻大王左右楚使

者曰臣受命於王以商於之地六百里不聞六里

皇甫謐帝王世紀曰四皓始皇時隱於商山作歌曰莫莫  
高山深谷逶迤曄曄紫芝可以療饑唐虞世遠吾將何歸  
漢志曰商屬弘農郡秦相衛鞅邑也

### 金州

十道志曰金州安康郡禹貢梁州之域于周楚之附庸  
後為楚地秦為漢中郡

帝王世紀曰安康為媯墟或謂之姚墟

後漢書曰鄭弘上書虞舜出於姚墟夏禹生於石紐顏容釋例曰舜居西城本曰媯汭

漢書曰西城屬漢中郡應劭曰媯墟在西北舜所居

即金城縣

房州

十道志曰房州房陵郡土地屬與金州同麋國也左傳曰楚子伐麋成大心敗麋師于防渚杜注防渚在麋地闕駟云防陵即春秋防渚也

漢志防陵上庸屬漢中郡

盛弘之荊州記曰竹山縣有白馬塞孟達為新城太守  
登白馬而嘆曰劉封中耽據金城千里而不能守豈丈  
夫哉

### 通州

十道志曰通州通川郡土地所屬與金州同春秋戰國  
並屬巴子國秦併天下為巴郡漢因之

後漢志曰宣漢屬巴郡即漢宕渠地也

巴漢記曰和帝  
分宕渠之東置

圖經曰西魏改為通州以其居四達之路故名

今為  
達州

渠州

十道志曰渠州潞山郡土地所屬與通州同漢志曰宕渠屬巴郡輿地志曰梁大通三年於此置渠州

左思蜀都賦曰外負銅梁宕渠

渝州

十道志曰渝州南平郡古巴國也

三巴記曰閬白二水東西流曲折三迴如巴字故謂三巴

山海經曰海內西南有巴國昔大皞生咸鳥咸鳥生乘釐乘釐生後昭是為巴人郭璞曰為巴始祖

李膺益州記曰明月峽在巴縣東壁高四十丈有圓孔形如滿月因以為名

又曰江津縣西有香草樓昔有仙人於此置樓居植香草於樓下一夕飛昇去後人指其地為香草樓

### 涪州

十道志曰涪州涪陵郡禹貢梁州之域周為雍州之地

春秋時巴國秦為巴郡漢為涪陵郡巴縣巴漢志曰涪陵巴漢郡之南鄙本與楚商於之地接

朗州

十道志曰朗州武陵郡禹貢荊州之域春秋及戰國時屬楚秦為黔中郡漢高祖五年更名武陵郡梁湘東王於荊州割武陵郡置武州陳天嘉元年分武陵立沅陵郡隋又改武州為辰州又改為嵩州又改為朗州

史記曰秦惠王十四年求以武闕外就楚易黔中地

武陵記曰後漢梁松自義陵移郡於若城今州東有張若城

晉書曰潘京武陵漢壽人也弱冠郡辟為主簿太守趙廆甚器之嘗問之曰貴郡何以名武陵京曰鄙郡本名義陵在辰陽縣界與夷獠相接數為所攻光武時移東山遂得全完共議易號傳曰止戈為武詩稱高平曰陵於是為名焉武陵記曰武陵郡境四千餘里

澧州

十道志曰澧州澧陽郡春秋戰國地屬楚秦屬黔中郡漢改黔中為武陵郡屬荊州今州即武陵郡零陽縣地吳分武陵西界立天門郡即此郡之境晉為南義陽郡隋平陳置松州尋改為澧州在澧水之北故取為名尚書禹貢曰岷山導江東別為沱又東至于澧

輿地志曰晉宋以義陽流人在南郡者立為南義陽郡寄荊州

十道志曰慈利縣即漢零陽縣地

圖經曰界內有零溪水即以為名隋開皇十八年改零陽為慈利縣

王仲宣贈士孫文始詩曰悠悠澹澹

澹澹二水在澧陽縣

### 巴州

十道志曰巴州土地所屬與通州同漢為巴郡宕渠縣四夷縣道記曰李特孫壽時有羣獠十餘萬從南越入蜀漢間散居山谷因思流布在此地遂從為獠所據

### 壁州

十道志曰壁州始寧郡本漢宕渠縣地後漢分置宣漢縣梁分宣漢置始寧後魏分始寧置諾水縣

蓬州

十道志曰蓬州咸寧郡本漢宕渠縣地

周地圖記曰武帝天和四年割巴州之伏虞郡隆州之地於此置蓬州

集州

十道志曰集州符陽本漢宕渠縣地晉惠帝永寧中李

特王蜀其地屬焉梁武改為東巴州後改為集州以東北有集水因以為名

又云以萬山所集故也

### 唐州

十道志曰唐州淮安縣禹貢豫州之域春秋楚地戰國時屬晉後入韓秦置三十六郡為南陽郡

漢志曰南陽郡有比陽縣比水所出東入蔡

左傳僖四年齊師伐楚楚子使屈完如師齊侯陳諸侯之師與屈完乘而觀之齊侯曰以此衆戰誰能禦之以

此攻城何城不克對曰君若以德綏諸侯誰敢不服君若以力楚國方城以為城漢水以為池雖衆無所用之晉太康地記曰自華至沘陽南北連百里號為方城亦曰長城

周地圖記曰湖陽縣光武所封外祖樊重邑又光武封姊為湖陽公主漢志曰湖陽古廖國也

廖音力救反

鄧州

十道志曰鄧州南陽郡禹貢豫州之域戰國屬韓秦置

三十六郡南陽其一也

釋名曰在中國之南而居陽地故以為名

漢志曰南陽郡領宛犍等三十六縣秦置莽曰前隊屬  
荊州

又曰鄧屬南陽故國都尉治應劭曰鄧侯國  
史記蘇秦說韓惠王韓西有宜陽東有穰涓

後漢書曰時天下墾田多不以實詔下郡國檢覆其事  
時諸郡各遣使奏事帝見陳留吏牘上有書視之云潁

川弘農可問河南南陽不可問帝詰吏不肯服時顯宗  
為東海公言曰河南帝城多近臣南陽帝鄉多近親田  
宅踰制不可為準

漢書曰秦滅韓徙天下不軌之人於南陽故其俗夸奢  
上氣力好商賈漁獵藏匿難制宛西通武關東受江淮  
一都之會也

圖經曰菊潭取界內菊潭水以名縣

盛弘之荊州記曰菊水其源傍有芳菊浸潤其流滋液

水極芳馨飲之者皆壽考

後魏略曰孝文帝南巡至新野臨潭水而見菖蒲花乃歌曰兩菖蒲新野樂遂建兩菖蒲寺以美之

楚地記曰漢江之北為南陽漢江之南為南郡

襄州

十道志曰襄州襄陽郡禹貢豫州之南境春秋以來楚地秦南郡之北界二漢為南陽郡獻帝時魏武始置襄陽郡

襄陽記曰襄陽本楚之下邑檀溪帶其西峴山亘其南亦楚國之北津也

荊州圖副曰建安十三年魏武平荊州始置襄陽郡以地在襄山之陽為名

楚地記曰關雲長攻沒于禁等七軍兵勢甚盛獨襄陽徐晃屯守不下曹公謂晃曰全襄陽者徐晃之功也後吳大帝率兵西時曹仁鎮之司馬懿宣言於魏王曰襄陽水路之衝禦寇要地不可失也

南雍州記曰永嘉之亂三輔豪族流於樊沔僑於漢側  
立雍州因人所思以安百姓也宋文帝因之置南雍州焉  
晉書曰山簡字季倫嘗鎮襄陽郡中有高陽池每臨池  
未嘗不大醉而還人歌之曰山公何所詣往至高陽池  
日暮倒載歸酩酊無所知時時能騎馬倒著白接離舉  
鞭問葛強何如并州兒

盛弘之荊州記曰襄陽郡峴首山南至宜城百餘里其  
間雕牆峻宇閭閻填列漢宣帝末其中有卿士刺史二

千石數十家珠軒駢輝華蓋連延掩映於大山廟下荊州刺史行部見之雅嘆其盛勅縣號為冠蓋里

漢書筑陽屬南郡故國今穀城縣莽曰宜禾應劭曰筑

水出漢中房陵東入沔

筑音逐

圖經曰穀城縣有鄼城漢志曰即蕭何所封也

均州

十道志曰均州武當郡禹貢豫州之域春秋時楚地秦置南陽郡

漢志曰武當屬南陽郡

十道志曰鄖鄉古麇國也左傳曰楚潘崇伐麇至于錫穴又地形志曰漢中郡之東界有錫縣即古之錫穴也

隨州

十道志曰隨州漢東郡春秋隨侯之國秦及兩漢屬南陽郡

左傳曰楚武王侵隨鬬伯比言於楚子曰漢東之國隨為大

漢志曰隨屬南陽郡故厲國也

左氏傳曰楚伐徐齊師伐厲救之

厲音賴

又曰春陵屬南陽郡侯國故蔡陽之白水鄉上唐鄉漢文帝元朔五年以零陵泠道之春陵鄉封長沙王子買

為春陵侯後以春陵下濕上書徙南陽

今棗陽有春陵故城

太平御覽卷一百六十八